

Исповедь деч ончыч шоналташ

(Южо священник тидым калыкын общий исповедьше ончыч молитва семын кучылтеш)

Ме Тыланет кумал моштен онал да кумалашат шонен онал. Тыйын эрыкетым кычалын онал да илышнан түрлө йыжынгыштыже Тыйын чыла верч тургыжланыметым умылен онал. Чыла жапыштат да чыла вереат шке эрыкнам шукташ тыршенна. Мыланна пуымо илышлан Тыланет таум ыштен онал да пүрымашлан өпкелен ойленна. Мыланна иктаж-мо эре йөрен огыл. Кап черна деч паремдаш Тыйым сөрваленна, но чоннам паремдаш йодын онал.

Господь, мемнам, сулыкан-шамычым, протитле.

Священный Возымашым ме она пале да она йөроте. Православный верам келгын умылаш тыршен онал да түрлө оккүлан үшаненна. Ме колдун-шамыч деч, шинчавочмо да енын локтымыж деч лүдынна, но Тыланет осал да таум ыштен моштыдымо шочшо лияш лүдын онал. Храмыште да мөнгыштө Тыланет лудмо молитваште мо нерген ойлалтмым умылаш тыршен онал, тыгодым йылмынаже Тый декет лишыл лийын, а уш ден шүмна Тый дечет тораште лийыныт.

Господь, мемнам, сулыкан-шамычым, протитле.

Ме пүтым кучен онал, Тыйын Капет ден Вүретым көргышкына чүчкыдын налаш тыршен онал але тидым йүштө шүм дене шуктенна. Тыланет кумалмына годым күлешлыкше шагал улшо йодышым рашемдаш тыршенна, Евангелийыште ончыктымо чоя да яжар ен-шамыч семын чудо ден палдарыше палым вученна, а Тыйым кычалын онал, да мемнан илышна Тый дечет торлен.

Господь, мемнам, сулыкан-шамычым, протитле.

Ен-влаклан шыдешкыме да вашке сырыме дене ме сулыкыш пуренна. Шке торжалыкна, вожылдымо да осал улмына дене сулыкым ыштенна. Опкынланыме да кычалтылме дене сулыкыш пуренна. Утым тургыжланенна, сайже лийын онал гынат, сайла кояш төченна. Мемнан деч сайрак илышылан көраненна, а мемнан деч удаврак илыше-влак деке пешкыде кумылан лийынна да нунылан полшен онал. Шужышым пукшен онал, вер гыч верыш коштышым суртышкына пуртен онал, черле деке миен онал, казаматыште шинчыше верч тургыжланен онал. Эре шке илышна да шкенан нерген гына шоненна.

Господь, мемнам, сулыкан-шамычым, проститле.

Ме шакшым ойленна да тидлан воштылынна, аватмут дене вурседылынна. Вес ең-влакым йӧрдымыш луктын, нуным ўлык шынденна, сандене чоныштына тыныслык лийын огыл. Лишыл енлан поро да ласка мутым ойлен онал; шотдымо, неле да мыскылтыш шомак дене шукуштым сусыртенна. Юмын храмыште ең-влакын йонгылыш лиймыштлан нуным торжан шылталенна, тидын дене шукуштым черке деч коранденна.

Господь, мемнам, сулыкан-шамычым, проститле.

Шке ача-аванам пагален онал, нуным чаманен онал, тыге сулыкыш пуренна. Шке пелашнам ондалкаленна. Юмым йӧраташ да Тудлан ўшанаш шочшынам туныктен онал. Шке йочанам йӧратен моштен онал, торжа лийынна але кўлеш-оккўлым ышташ эрыкым пуэнна. Южо йочанам шочмышт деч ончычак пуштынна. Ме ўскырт да сыраш йӧратыше лийынна. Ушкалыше да чытамсыр лийынна, шке ешыштына улшо-влакым оза семын онченна. Шке лишылна-влакым ӧрдыж ең дечат ўлык шынденна, нунын ўмба кычкыренна, мыскылен ойленна. Ме оза лияш да чылаштым шке кид йымалне кучаш тӧченна. Шойыштынна да чыныш лекташ тыршенна, шке деч вийдыме ўмба киднам нӧлтенна. Ача-авана, пелашна да шочшына верч кумалын онал. Шкенам кресэрге ден кресўдырна верч, кресача ден кресава-влак верч тыршен онал, нунын верч кумалын онал.

Господь, мемнам, сулыкан-шамычым, проститле.

Ме чаманыдыме да вуеш налше улына. Оккўлжымат палаш тыршенна да шотдымо лийынна. Ўчым шуктышо да осалым шарныше, його да аптыраныше улына. Ойгыш вочмо да шўлык дене сулыкыш пуренна. Юмо, Тый мемнам шкенам да мемнан илышнам уэмден да вашталтен кертат манын, ўшанен онал. Шке лишылнан да шкенам ончыкылыкнам Тыланет ўшан дене кучыктен онал. Юмо, Тыйын чапле да лўдыкшӧ Толшашетым куан дене вучен онал. Ме шуко верч тыршенна, а нимо деч посна кодынна.

Господь, мемнам, сулыкан-шамычым, проститле.

Юмо, Ик Тыйын Господь улметым монден, мыланна пашам пуышо-шамычлан сай лияш тӧченна да нуным«сеньор» але «господа» манынна. Ме шкенам пенгыдын кучен кертдыме, ответственностьым шижын

шогодымо да лүдшө лийынна. Опкынланен кочмына да утым йүмына дене сулыкыш пуренна. Шке шижмашнам, уш-акылнам да жапнам компьютер ден телевизорлан пуэнна. Ме шолыштынна. Сулыкым почын ойлымына годым шкенам чаманенна, чояланен ойленна. Шкенам колымашна нерген шонаш да тидлан ямдылалташ лүдынна, сандене Тыйым кызыт шинчаваш ужаш ямде онал.

Господь, мемнам, сулыкан-шамычым, протитле.

Христианин лүмым нумалына, а шкеже моло-влак самынак илена, шукыж годым – уданрак. Юмылан үшанымаште лушкыдо да үнардыме улшо ен-влак мемнам чын христианинлан шотленыт, а ме нуным осал пашана да шомакна дене алгаштаренна гына. Ен-влак ончылно могай улмына нерген шоненна, а Юмо ончылно могай улмына нерген шонен онал. Ен-влакын ойыштым колыштын онал да колышташат шонен онал. Вет ме эгоист лийынна да эре шке нерген гына шоненна. Шке үшанымашнам вес ен-влак ончылно почын ончыкташ вожылынна. Юмо мыланна «мландын шинчалже» да «түнялан волгыдо» лияш күштен, а ме тыгай лийын онал. Шкежат үшаныдымаш дене орланена да чоннажат пуста, сандене Евангелийлан торешланена да үшаныдымаш да чон пусталык дене орланыше-влаклан шке үшанымашна нерген умылтарен она керт.

Господь, мемнам, сулыкан-шамычым, протитле.

Виян, проста да үнышө шүлышым поген онал, түжвалсылан гына түткө лийме дене ме фарисей самын сулыкыш пуренна. Христосын каласымыж самынак, ме чиялтыме колотка гай лийынна. Тудо үмбачын гына моторын коеш, а көргыжө йырнык да шүйшо дене темын. Юмо, Тый мемнам пүрымет годым мыланна пуымо Тыйын түсетым ме локтылынна, кеч Тый тудым тынеш пуртымо дене уэмденат ыле да кажне Причастий годымат уэмдет.

Господь, мемнам, сулыкан-шамычым, протитле.

Господь! Тый мемнам Шкендын йывыртише да эрыкан шочшет лияш үжынат, а ме куанен моштыдымо да шүлыкан кулыш савырненна. Тыйын нерген чонна йокроклана да Тыйым шортын кычалеш. Тый денет лыпланыме марте шүмна ласкалыкым ок пале.

Господь, мемнам, сулыкан-шамычым, протитле.